

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“E ua haapao oia i e tahi pae ei aposetolo; e te tahi pae ei peropheta; e te tahi pae ei haapii evanelia; e te tahi pae ei tia i e ei orometua; ei faaau i te feia mo'a i te ohipa ra e orometua, ia tupu i te maitai te tino o te Mesia ra.” Eph. 4: 11, 12.

Nu. 12.

10 Tetepa, 1909.

Mat. 2.

Te Mau Toroa i Roto i te Ekalesia i Faatihia e te Mesia Ra

Ua tonono maira te Atua i ta'na Tamaiti fanau tahi i roto i teie nei ao. ia haapii mai oia i te taata atoa i te e'a e tae atu i te basileia o te ao ra. Ua na ô maira oia “O vau te e'a te parau mau e te ora, aore roa e taata e tae i te Metua ra, maori râ ei ia'n.” Ioa. 14: 6. Aore Iesu i haapii mai i te hoê parau maori râ ua faanehia oia e ta'na Metua ra. Ioa. 8: 28. Ua haapii mai te Mesia i ta'na evanelia ia faaauhia te taata'toa e te Atua ra. Ua faatia i hora oia i ta'na Ekalesia i oia iho i te fenua nei, ia haapii-taman-hia â ta'na evanelia i muri a'e i to'na revaraa'tu i nia i te ra'i, e ia tahoehia te aau o te taata'toa. Ua poro haere oia i te evanelia. E ua faaroo toofanu na taata rii hoi, e na pee maira ratou ia'na. Mar. 1: 18 Hoê noa iho ekalesia ta te Fatu i faatia i roto i teie nei ao. E teie nei, no te mea na han-re te ekalesia e vai nei, ia imi te taata teihea te ekalesia mau i faatihia e Iesu e tia'i, e teihea ra

hoi te ekalesia i faatiahia e te taata o tei farii i te tahi pae o te Parau a te Atua e tei faarue ê atu i te tahi pae. Te na ô maira te Mesia, "Ua hinaaro outou ia'u ra, e haapao ta'u parau." Ioa. 14: 15. Te vai nei te mau tapao e rave rahi e itea'i te Ekalesia mau a Iesu Mesia, eiaha râ e mana'o e, e papu te mana'o i te imiraa maori râ ia ore te tiaturi i te parau na te taata, e ia tamauhia te aau i nia i te parau a te Atua ra. Te na ô maira te tahi mau taata, "Eaha hoi te faufaa o te parau i papaihia i roto i te Bibilia nei?" Teie te pahonuraa, E faufaa rahi roa ia. Mai te faaitesia mai e te aposetolo ra o Paulo, "I te parau mo'a e papaihia ra o te parau ia e paari ai oe e tae noa'tu i te ora, i te faaroo i te Mesia ra ia Iesu. Te mau parau mo'a atoa i papaihia ra e mea faaurua mai ia e te Atua, e e mea maitai ei haapiiraa ei a'oraa, ei faaiteraa hapa, ei faaite mai i te parau-tia ra." 2 Tim. 3: 15, 16. E te parau na te Atua, e faaite papu mai i te mau tapao, e itea'i ta'na ra ekalesia mau, e taa ê roa'i te mau ekalesia atoa a te taata nei. Te haamori nei te ekalesia mau a Iesu Mesia ra i te Atua o tei haamoriahia e te mau peropheta i te mau anotau tahito, mai te mata-mua mai â e tae roa a'e nei i te Mesia ra, oia hoi te Atua no Aberahama, e no Isaaka, e no Iakabo. Tei faaroohia to'na reo e Petero ratou o Iakoba e o Ioane. Mat. 17: 5. Tei iteahia to'na tino i te parahiraa i nia iho i to'na terono e Setephano (Ohi. 7: 55, 56), e o Ioane pipi here hoi (Apo. 5: 1-7). E o Iesu hoi to'na ra hoho'a man. Heb. 1: 3; Ioa. 14: 8, 9. I hamanihia hoi tatou i to'na ra hoho'a. Gen. 1: 27. Ia ite tatou i te tahi ekalesia i te haamoriraa i te idolo, aore râ i te atua mata'i, e aore râ i te atua mahana, e aore râ te hoê noa'tu atua aita e au i te taata i to'na hoho'a, e tapao papu roa ia te reira, e ere ia tera ekalesia te ekalesia mau na Iesu Mesia.

E rave rahi te mau ekalesia i roto i teie nei ao. Ua rau te hurn o to ratou mau haapiiraa. Te faahapa nei te tahi i te tahi. E parau ê ta te tahi i te tahi. Teie te tahi tumu i

amahamaha noa i te mau ekalesia i roto i teie nei ao, oia hoi no te mea ua faaroo pae tahi noa ratou i te parau na te Atua. Hoê noa iho ekalesia ta Iesu i faatia i nia i te fenua nei; eiaha e piti e e toru noa'tu. Hoê hoi evanelia ta'na i haapii mai; eiaha e piti, e e toru noa'tu. Eph. 4: 5. Te haapii mai nei te tahi mau ekalesia e ora te taata i te faaroo ana'e, e te haapii mai nei te tahi e, e ore te taata e ora i te faaroo ana'e, ia anoihia ra te faaroo e te ohipa e tia'i. Te na ô nei ra te parau a te Mesia, "E ore te feia e parau mai ia'u ra e, e te Fatu, e te Fatu e hope paatoa i te tae i te basileia ra a te ao, o te taata râ i haapao i te hinaaro o tau Metua i te ao ra." Mat. 7: 21. Te haapii nei te Ekalesia a Iesu Mesia e, o tei faaroo, e o tei haapao maitai i te mau faaneraa, e te mau ture hoi a Iesu Mesia, e ora ia. O vai ra te ore e tae i te basileia a te Atua ra? O tei rave i te hara ra, e ore ia e tae i reira. Eaha ra te hara? O te faahapa i te ture ra, o te hara ia. 1 Ioa. 3: 4. I ite tatou i te hoê ekalesia o te haapii e, e ora te taata e faaroo to'na, mai te mea a haapao atoa oia i te mau ohipa atoa i faauehia mai e te Atua, e tapao ia te reira e, o te Ekalesia mau ia o Iesu Mesia. Ia ite tatou i te hoê noa'tu ekalesia tei haapii e, e ora te taata i te faaroo ana'e, e tapao papu ia e ere ia i te Ekalesia a Iesu Mesia, no te mea ua papai te aposetolo a Iesu e, o te faaroo aore e ohipa, e mea pohe ia. Iak. 2: 17.

Ua haapao ihora Iesu Mesia i te toroa aposetolo i roto i ta'na ekalesia. E ua maitihia ratou e ana, e ua haamanahia ratou e ana, e ua tuu oia ia ratou i roto i te Ekalesia, o mua ia. Luk. 6: 13-16; 1 Kor. 12: 28. Ia ite tatou i te hoê ekalesia, aore te toroa aposetolo i roto ra, e ite ai tatou e, e ere ia te ekalesia i faatiahia e Iesu Mesia, no te mea hoi na tuu ihora oia i te aposetolo i roto i ta'na ekalesia. Ua tuu atura Iesu Mesia i te peropheta i roto i te ekalesia (Eph. 4: 11; 1 Kor. 12: 28), no te mea te na ô maira te parau a Iehova, "Aita a te Fatu ra a Iehova e peni rave, maori râ i faaite i ta'na parau i moe ra i ta'na mau tavini i

te mau peropheta.” Amos. 3: 7. Mai te mea e, te vai nei te hoê ekalesia e ere te peropheta i roto, e tapao papu roa ia, e ere ia i te ekalesia na Iesu Mesia, na te taata ana’e râ. Ua tuu Iesu Mesia i te haapii evanelia i roto i ta’na ra ekalesia. Eph. 4: 11; Ohi. 21: 8. Aore teie nei toroa i roto i te ekalesia, e tapao ia, e ere na te Atua taua ekalesia ra. Ua haapao atoa te Atua i te tahu’a rahi i roto i ta’na ekalesia, mai tei faaitohia mai i te Bibilia nei. Heb. 5: 1-10. Ua haapao te Mesia te toroa hitu ahuru i roto i te ekalesia. E ua haamana’tura oia ia ratou ia a’ohaere i te evanelia, ia faaora i te ma’i, e e parau atu i te feia e, ua fatata maira te basileia ia outou. No reira, aita e tia ia faaore te reira toroa. Luk. 10: 1-9. E ere anei te toroa episekopo i roto i te ekalesia i haapaohia e te Fatu ra? Tei reira ia. Phil. 1: 1; 1 Tim. 3: 1, 2. Tei roto atoa i te ekalesia a te Fatu ra, te toroa peresibutero. Aita e tia ia faaore i te reira toroa, no te mea e ohipa rahi ta’na i rave i roto i te ekalesia a te Atua ra. Ohi. 14: 23; 1 Pet. 5: 1-3. Tei roto atoa i te ekalesia a te Fatu ra te toroa tahu’a. Luk. 1: 5; Apo. 5: 10; 20: 6. Ua haapao atoa te ekalesia a te Mesia i te toroa haapii. Ohi. 13: 1. E tei roto atoa i te ekalesia a te Fatu i te toroa diakono. 1: Tim. 3: 8; Phil. 1: 1. Ia ore teie nei mau toroa mai te aposetolo e tae noa’tu i te diakono i faaitohia mai i nia nei, i roto i te hoê ekalesia, e tapao papu roa ia, e ere ia i te ekalesia ta Iesu i faatia i rotou i te taata nei, no te mea na’na iho i tuu mai i roto i ta’na ra ekalesia. Eaha te tumu i haapaohia’i teie nei mau toroa i roto i ta’na ekalesia? Teie ia, maori râ e, ia faaauhia te feia mo’a i te ohipa ra e orometua e ia tahoeia te aan o te taata’toa nei. Eph. 4: 11-16. Ia ite tatou i te hoê ekalesia i te na ôraa e, i te haapiiraa, ua ore te tau i haapaohia no teie nei mau toroa i roto i te ekalesia, ua riro ia e tapao papu e ere ia te ekalesia na Iesu Mesia, no te mea ua faahapahia ia te reira huru haapiiraa e te aposetolo ra o Paulo. 1 Kor. 12: 27, 28. E teie nei te vai amahamaha noa nei â

to te mau ekalesia i roto i teie nei ao. E no reira te ite papu nei matou e, aita e oti te ohipa i faaauhia na te feia toroa i roto i te ekalesia a Iesu Mesia. Aita, aita roa'tu e tia i te hoê o teie nei mau toroa i faarue ê atu i te tahi. 1 Kor. 12: 18-22. E homa e, tei ia vai te parau mau? Teihea te mea maitai ia tatou ia farii, te mea tia mau ra, e aore râ i te mea pae tahi ana'e ra? —VILIAMU.

**“Eiaha Roa Oe e Pari Maavare
ia Vetahi E”**

Exodo 20: 16.

Te faaite mai nei o Mose i te huru o te mau ture ta Iehova i papai i nia i na papa ofai (Exo. 34: 1-28), oia hoi o na ture hoê ahuru ia. Uiraa: Eaha te auraa o teie nei ture e, “Eiaha roa oe e pari haavare ia vetahi ê?” Pahnoraa: O te taata ia o tei moe ta'na tao'a, mai te moni, e te mau huru ohipa'toa, mai te ite ore oia i taata i rave, na riro oia ei pari haavare i ta'na taeae. Te na ô maira Mose, “Eita e tia i te hoê i te taata nei ia hapa oia i te mau hara i te mau ino atoa e ravehia nei, tei te parau râ a na ite toopiti, e tei te parau a na ite tootoru ra, e riro ai tana parau ra ei parau mau.” Deut. 19: 15.

Ia tia noa mai te ite haavare i te hoe taata, e ua pari maira ia'na i te hara, e haere tana na taata na raua tana parau ra i mua ia Iehova i mua i te aro o te feia tahu'a e te mau haava, i te reira ra anatau. E na te mau haava e imi maite; e inaha e ite haavare tana ite ra, e ua parau oia i te parau haavare i ta'na taeae, mai te rave ta'na i mana'o e rave i ta'na taeae ra, e na reira'toa outon ia'na, ia taa ê atu i te ino ia outou na. E riro hoi te tahi pae i te ite, e riro i te mata'u; e eita'tura e rave faahou i tana ino ra i roto ia outou na. Irava 16-20.

O teie nei ture i faaitohia i nia nei, ua tuuhia'tu ia e te Peropheta ra e Mose i te tamarii a Isaraela, ei haapaoraa

na ratou, ia ore ratou i hapa i taua ture. Oia'toa i teie nei anotau hopea nei. Te tupu nei te pari haavare, te haavare nei te taata i ta'na taeae. E rave rahi tei iteahia ua poro haere te mau tavini o te Fatu i te Evanelia, e te haapii atu i te taata i te e'a e tae atu ai i te ora. E te tupu noa ra te haavare e te hamani ino ia ratou e te parau atu e, e feia haavare. Ua riro teie nei mau pariraa ei parau haavare no te mea na te ohipa e faaite i te taata e tavini mau ratou na te Atua, no te mea te haapao ra ratou i to te Atua hinaaro, e ta'na ra ture.

E mauruuru anei te Atua i te taata o tei ore e haapao i taua ture ra? Aita. No te aha? No te mea ua faahapa oia i te ture a te Atua. Ia haapae roa te haavare ei parau mau ta te taata'toa ia parau atu i te tahi, e melo 'na'e hoi tatou no tatou iho. Eph. 4: 25; Kol. 3: 9; Lev. 19: 11. Te faaite atoa mai nei o te aposetolo ra o Panlo e, eiaha ei aroha haavare (Rom. 12: 9, 10) ia aroha tatou i te taata tupu. O vai te taata tupu? Teie te taata tupu, o te taata'toa o teie nei ao. Mat. 22: 39; 1 Ioa. 4: 21. E te feia o tei ore e haapao i teie nei ture, o vai to ratou metua? O te diablo to ratou metua. No te aha? No te mea te faaite mai o Iesu, Eaha outou i ore i ite ai i tau parau? no te mea aore e tia ia outou i te faaroo mai i tau parau. O te diablo to outou metua i faatia ia outou i te hinaaro o to outou metua ra. E taparahi taata mai te matamua mai â, aore oia i haapao i te parau mau, no te mea aore e parau mau i roto ia'na. Ia parau oia i te parau haavare ra, ua parau ia i te parau au ia'na ihora, e haavare oia, e e metua hoi no te haavare. Ioa. 8: 44.

Uiraa: Eaha te faufaa no teie nei ture ia haapao te taata o teie nei ao? Pahonoraa: Teie ia, e roaa mai te roo maitai, e riro oia ei hi'oraa maitai, ei taata parau-tia e aore roa e haavare o roto ia'na.—RUA.

O te paran mau, o te mea ia o tei vai nei.—IOS. SEMITA.

Te Aroha

Te evanelia o te Mesia, o te mana ia o te Atua, e “i aroha mai te Atua i to te ao, e ua tae roa mai i te horoa mai i ta’na Tamaiti fanau tahi, ia ore ia pohe te faaroo ia’na ra, ia roaa râ i te ora mure ore.” Ioa. 3: 16. E oia’toa i te Mesia no ta’na aroha rahi i to te ao, ua haere noa mai oia i teie nei ao ei hoo i te taata’toa. 1 Tim. 2: 6. E ua farii noa oia i te mau mauui o to e te mau hamani ino roa i te feia hara, e tae roa mai i te tahe-noa-raa to’na hou mai te toto putua i te huru, e e tae roa mai i to’na poheraa riaria. No ta’na aroha rahi ia tatou nei, ua auraro noa oia i teie nei mau mea, e aita roa’tu e taata aroha i au i ta’na, “ia horoa te taata i to’na iho ora no to’na ra mau taua, aita roa e taata aroha ê atu i tei reira.” Ioa. 15: 13.

I te hoê mahana ua tae mai i te hoê papai parau ia Iesu e ua ui mai oia ia’na, na ô maira, “Teihea na te parau rahi o te ture ra?” E ua pahono atu Iesu, na ô atura, “E e hinaaro oe i to Atua ia Iehova ma te aau atoa, e ma to varua atoa, e ma to mana’o atoa, e ma to puai atoa; o te parau teie i han i mua; e mai te reira atoa hoi te piti, E aroha’tu oe i to taata tupu mai te aroha i to oe iho na. Aita atu â parau e hau i te reira.” Mar. 12: 30, 31. Teie na irava e piti nei, e parau rahi no tatou, no te mea ia haapao tatou i te reira, e oti ai i te pae rahi o te mau faaueraa a te Atua ite haapaohia e tatou. E ua parau atoa Iesu, na ô atura, “Tei ia’na ta’u parau e ua haapao oia i taua parau ra, oia tei hinaaro mai ia’u; e tei hinaaro mai ia’u ra, e herehia mai oia e tau Metua ra; e e here hoi au ia’na, e e faaite atu hoi au ia’na ia’u iho. Ia hinaaro mai te taata ia’u ra, e haapao ia i ta’u parau; e e here mai hoi tau Metua ia’na; e e here atoa mana ia’na ra e parahi mau atu i ô na ra.” Ioa. 14: 21-23. E no reira, a aroha atu tatou i to tatou mau taata tupu mai te aroha ia tatou ihora e tia’i, mai te mea ra e ia hinaaro tatou ia Iesu. E ia na reira tatou e ore roa ia to

tatou mau peapea e te mau iui oto atoa hoi, no te mea na'na hoi e here mai ia tatou e e tamahanahana oia i to tatou mau aau. Te aroha no te Atua e te evanelia no te Mesia, e raua ana'e hoi o tei faaore roa i te mau hara, e te mau mea viivii e te riaria o teie nei ao, e o tei faatia i te mau parau-tia. Te ite nei tatou e, ua faatia mai Iesu i te e'a tia, e te hinaaro nei â oia ia tatou ia pee atu ia'na ma te feaaraa ore. E eiaha tatou e faaea i te aroha atu i to tatou mau taata tupu ana'e; a aroha atoa'tu tatou i to tatou mau enemî, e o tei hamani ino mai ia tatou, mai ta Iesu i parau mai i to'na a'oraa: "E aroha atu i to outou mau enemî: e faaora'tu i tei tubi mai ia outou; e hamani maitai atu i te feia i riri mai ia outou; e pure hoi i te feia i parau ino mai e tei hamani ino mai ia outou." Mat. 5: 44.

Ahiri i na reira i to te ao atoa nei, eaha te huru o teie nei ao i reira? Teie ia, mai te ô i Edene te huru, e vahi nehenehe e te maitai rahi, te hara ore e te viivii ore hoi, ei mono no teie nei ao viivii e te hara rahi. E no reira, a arara maitai tatou i te peeraa'tu i te taahiraa avae o te Mesia, ia maramarama maitai i to tatou mau lamapa i mua i te aro o te mau taata'toa, ia hi'o mai ratou i ta tatou mau ohipa maitai, e ia haamaitai ratou i to tatou metua i te ao ra. E e haamaitai tatou i te mau taata'toa ma te haamana'o ra e, "O ta outou hoi e faaino ia vetahi ê ra, e faaino-atoa-hia ia outou i reira, e te faito ta outou e faito atura, o te faito atoa ia, i ta outou." Mat. 7: 2. E no reira, e hoa ino ma e, e au roa ia tatou ia haapao i te parau matamua i roto i te evanelia a te Mesia, e ia aroha'tu i to tatou mau enemî, e mai te mea ra e, e tae mai te hoê taata i to tatou mau fare, noa'tu te huru o te taata, eiaha roa'tu tatou i opani i ta tatou mau opani i ta'na ra mata; a farii râ ia'na i roto i to tatou mau fare ma te haamaitairaa ia'na i te mau mea ta'na i hinaaro. "Ia vai maite mai â te aroha taeae. Eiaha e faaore i te ite atu i te taata êê ra, e melahi hoi tei itehia'tu e vetahi aore i ite e melahi." Heb. 13: 1, 2.

E no reira ia tae mai te hoê orometua o vetahi haapao-raa ê, mai te haapii noa i te huru o to'na faaroo, eiaha roa'tu tatou e faaetaeta noa i to tatou mau aau ia'na, a huri ia'na i rapae i ta tatou mau fare ma te faaroo-ore-hia i ta'na parau, ma te mana'o ra e, e ite tatou i te evanelia a te Mesia, no te mea teie te huru mau a te mau Pharisea e te mau Papai parau ia Iesu Mesia; ua tahitohito ratou ia'na, e ua hamani ino roa ratou ia'na tae roa i te faasatauro ratou ia'na. Ua rave noa ratou i teie mau ohipa ino ma te tumu ore, na roto râ i to ratou aau etaeta, no te mea ua tia roa i ta'na haapiiraa, e e mea hape rahi roa ratou i ta ratou mau haapiiraa, e oia'toa ia tatou ia faaetaeta noa tatou i to tatou mau aau i te tahi orometua a vetahi haapaoraa ê, i ta tatou i faaroo nei, e hape rahi roa tatou, e e tapao mau ia te reira ia tatou, e ere roa oia i te tavini no te Mesia o tei faaetaeta e ta'na aau. E no reira ia tae mai te hoê orometua i to tatou mau fare, a farii mai tatou ia'na, e e hi'opoa to'na huru e te huru o ta'na haapiiraa, e mai te mea ia tano ta'na parau i te Parau a te Atua, a farii mai na. Ua horoa mai te Atua i te tiamâ ia tatou i teie nei ao e tia ia tatou ia rave i to tatou ihora hinaaro, e au râ to tatou ora mure ore i te ohipa i ravehia e tatou i teie nei ao.

E no reira, e au mau hoa e, ia haapae atu tatou i te mau ino, e ia tapea i te mau maitai atoa ra, e e tiaturi noa tatou i te Atua. E haamana'o maitai tatou i te parau i roto i te evanelia a te Mesia, i te aroha'tu i to tatou mau taata tupu, e to tatou mau enemi, e i te mau taata'toa o te ao nei i te aroha taeae. E e faaanaana maitai i to tatou mau lamapa i mua i te aro o te feia parau tia ore, e o to te ao atoa na, a hi'o mai ratou i to tatou mau maitai, e to tatou mau ohipa tia, e ia haamaitai to tatou Metua i te ao ra. Mat. 5: 16. E tia ia tatou ia noaa i te mau mea ta te Atua i vaiiho no te feia parau-tia. 1 Kor. 2: 9.—PATAMANA.

O te ite, o te hanahana ia o te Atua.—IOSEPHA SEMITA.

Te Mau Parau Api.

TAARAA MATO I FAAONE, POHERAA RIARIA RAHI

I te 13 no Atete ua haere Tahito a Tetiarahi i te fei i te peho ra o Taofe, e vai i roto i te oire ra i Faaone, e ua taa ihora oia i te mato. I te 14 ua haere te Motui Farani, o Chechillot e to Faaone e tii i to'na ra tino. Ua tae atu toopiti taata pihaiho i to'na tino i ropu i te tarava no taua mato ra. Ua tapeahia to'na tino e te tahi tumu fei, ua parari roa to'na upoo, e ua pahure to'na iri upoo, e ua ore to'na rouru. Ua mahiti to'na mata, ua rarerare to'na tino hoê paeau taatoa. Ua parau mai raua, eita e nehe-nehe ia afai i to'na tino tahatai, no te mea e vahi ino roa taua vahi ra. Ua faaue te Motui Farani, o Chechillot, e tamata faahou ananahi. I te 15 no Atete, ua tae mai to'na mau fetii no Pueu. Ua haere ratou, e te Motui Farani, e to Faaone i uta i taua mato ra, e na roto i te taamu i te mau taura i te mau tumu raau, ua noaa te mau fetii no Pueu i to'na tino, e ua afai ratou ia'na i Pueu e tanu. No reira hoi oia. Ua pohe oia i te ma'i hopii, e ua mana'ohia a haere ai oia i taua vahi ino ra, ua roohia oia e ta'na ma'i tumu, oia hoi e hopii, e ua taa ihora oia i taua mato ra. E ara tatou o te tii i te fei a pohe tatou i tau pohe riaria ra.

I te 2 no Tiurai ua pau te tahi aua sitona i te auahi i te fenua ra o Tarafonia. E 3000 tâ fenua te rahi o taua aua ra, e 125,000 dara te moni e au i te sitona i pau.

I te 1 no Tiurai ua auene faahou te fenua ra o Itali e ua mairi i raro te mau patu fare i ore i pau roa i te aueneraa o taua fenua ra i te avae Titema, 1908. Aita te oire Mesina i patu-faahou-hia i muri a'e i taua pau rahi ra, ua toe mai râ e 25,000 taata o tei taoto i roto i te mau fare aore i pau roa, e teie nei, ua roo-faahou-hia mai ratou i te mata'u rahi i te mea ua auene faahou to ratou fenua e aita i noaa ia ratou te tahi tau iti ei mapuhiraa aho.

E ere i te mea maere te auene-faahou-raa te fenua Itali no te mea ua iteahia e te taata aita te fenua i auene tahi noa a faaea'i, ua auene pine-pine râ. Ua auene te fenua Vaihi i te m. 1868 e 2,000 to'na aueneraa. Mea rahi roa to te fenua Helene aueneraa mai te m. 1870 e tae noa'tu i te m. 1873, aita râ te tao'a i pau maori râ i na aueneraa e 300, e e 35 noa iho aueneraa i faaitchia i roto i te mau nupepa. Hoê minute e e pae setoni te maoro o te ueeneraa i pau ai te oire ra o San Francisco i te fenua Tarafonia i te 18 no Eperera, 1906, ua auene pinepine râ te fenua i taua mahana ra e i te mau mahana i muri a'e. Ua parauhia e, te mairi nei te fenua i raro i te pae miti i ropu ia Itali e ia Sicily, e o te reira ia te tumu no te ueue-pinepine-raa o te fenua Itali.

Ua faaite mai te hoê orometua mai te hau Beritane mai, teie te rahi o te mau taata o tei pohe roa i te mau matahiti atoa ra, i te hoê tufaa fenua o te parauhia o Scotland, oia hoi 6,000. E teie te tumu a pohe ai ratou, oia hoi inuraa ava. E au mau hoa e, eiaha roa e vare i taua ava haavare, e e haapohe taata nei.

I te 20 no Tiurai ua tere te taata Amerika o Orville Wright na roto i te reva i roto i to'na ra pahi mata'i e 70 maile. Hoê hora e 20 minuti e e 45 setoni te maoro o to'na ra tereraa, e mai te 260 e te 280 avae te teitei o to'na maueraa i roto i te reva. Ua au te oioi o to'na tereraa i te haereraa o te mata'i i te vero u'ana, e 60 maile i te hora hoê. Ua roaa ia'na e 35,000 dara no to'na tere. Na te hau Amerika taua moni ra i horoa ia'na.

I te mahana 19 no Tiurai, ua tamata te hoê taata Farani, o Herbert Latham te i'oa, ia faatere i ta'na pahi reva mai te fenua ra o Farani, e tae noa'tu i te fenua ra o Beritane. E area miti tei ropu i taua na fenua ra e piti nei. E inaha, ua tere maitai roa ta'na pahi reva hoê ahuru ma ono maile. Ei reira ua ino te hoê auri machine i nia ia'na, e ua mairi noa taua pahi reva nei i nia iho i te moana. E ua panu noa, aita e paremo. E muri iti a'era, ua faaorahia oia e te hoê pahi manuâ Farani. E ua parau maira taua taata ra, eita e maoro e tamata faahou. E te mana'o nei oia e noaa ia'na taua vahi hinaarohia e ana ra.

I te avae Tiurai mairi a'e nei, i te pae apatoa i te fenua ra o Amerika, ua taero toopiti taata i te ava. E ua taputo raua. Ua patia te hoê i te tipi e ua pohe roa. E i muri a'era ua haruhia oia e te motui, e ua tuu te motui ia'na i roto i te fare auri. E inaha, i te tuiaraa po ua haere te hoê tiaa rahi taata i te fare auri, i te vahi i tapeahia taua taata ra. E ua faaue ratou i te taata tiaa fare auri, na ô atura, "A tuu haapeepee mai ia matou i taua taata taparahi taata nei." Area aita oia iriti i te opani ia ratou. Ei reira ua haaparari i hora ratou i te opani, e ua tuu te hoê taura i nia i te a'i o taua taata ra, e ua taamu i nia i te hoê amaa raau. E ua tarîhia oia e ratou, pohe roa'tura.

I te 21 no Tiurai ua roohia mai te oire ra o Galveston i te fenua Amerika i te miti rahi e te mata'i puai i au i te vero rahi i pau ai taua oire ra i te m. 1900. E 23 taata i pohe roa i roto i te miti, e ua pau te tao'a e 750,000 dara. Ua mana'ohia e mea iti roa tera. I te m. 1900 ua pau roa te oire i te vero u'ana mai te reira ra te huru. Ua patu-faahou-hia te oire, e ua patu-atoa-hia te tahi aua ofai 17 avae te teitei e 11 maile te roa, e ati i te oire i te pae tahatai ei paruru i te oire i te miti peneia'e e roo-faahou-hia mai ai te oire i te vero rahi, e inaha ua tae mai te vero e ua pau to'na ra puai i nia i te aua, e ua ora to te oire e to'na tao'a rahi. Ahiri aita te aua, ua milioni te moni i pau, mai i te m. 1900 te huru.

I te 16 no Tiurai ua aueue te fenua Heleni apatoa, e ua pohe roa e 300 taata. Mea rahi roa te mau fare i mairi i raro. Ua pihaa te pape veavea no raro mai i te fenua i tera vahi e i tera vahi, e ua riro te mau anavai e te mau pape tahe mai te toto te huru.

I te 31 no Tiurai ua pau te oire ra o Osaka i te fenua Iapone i te auahi. Ua pau roa i te auahi 11,368 fare. Ua pau e 8 fare haapiiraa tamarii, e 4 fare moni, e 20 hiero haamoriraa, 11 fare toa rarahi, e te mau fare toa e rave rahi te hanereraa. E 25 hora te amaraa. Hoê noa ihe taata i pohe roa.

I te 25 no Tiurai ua tere te taata Farani ra o M. Louis Bleriot i roto i to'na pahi mata'i mai te fenua Farani e tae atu i te fenua Beritane. Ua taa ê te fenua Farani e te fenua Beritane i te miti e 21 maile te roa. Ei roto i te reva i nia'e i te miti to'na tereraa, e aita i pau te afa hora ua tapae i te fenua Beritane. Ua roaa ia'na te rê e 5,000 dara no te mea o oia te taata matamua i tere mai te fenua Farani i Beritane na roto i te reva.

Te parahi nei te hoê orometua i te fenua ra o Papua. E te parau nei oia, te vai etene noa ra te tahi pae taata i reira i teie nei â. E ia tama'i ratou ratou ihora. E te pae o tei vi i roto i taua tama'iraa, ua riro to ratou mau upoo i te pae upootia. E e rave atoa hoi ia ratou i te i'o no nia iho i to ratou mau tino pohe, e e afai atu i te reira i to ratou mau hoa ei maa na ratou. E ua riro te reira e tapao, ua upootia hoi ratou. E teie nei i'o na nia iho i ta ratou mau tino pohe nei, e mea afaihia ia. Mai ta te mau papaa e afai noa te faraoa monamona no te oroa faaipoiporaa i to ratou mau hoa, e mana'oraa no te faaipoiporaa.

Te hamonia rahi i te fare pureraa no te Ekalesia a Iesu Mesia i te Feia Mo'a i te Mau Mahana Hopea Nei i te oire Roto Miti. E mea maerehia e te taata'toa o tei tae i reira. E mea navenave rahi hoi to'na oto ia faaroomia e te taata. E pae hanere taata te pupu himeneraa i haapaohia pihaiho ia'na. Teie te faito o taua hamonia nei, oia hoi 30 avae te aano, 33 avae te teitei, e e 32 avae te hohohu. E te moni i pau i te hamaniraa-hia mai te matamua mai â, oia hoi, 130,000 dara. E te pupu himeneraa, ua tui to ratou roo i te mau fenua'toa ra. Ua haru ratou i te rê piti i te haruraa rê o to te ao atoa nei, i te oire ra o Chicago i te m. 1893.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.